

Maisogon kag determinado nga paslawon ang mapintas nga atake sang berdugo nga rehimen ni Duterte!

Pahugton ang angot sa masa! Isulong ang inaway banwa sa Isla sa matinugahon nga paagi!

GINLATAG SANG REHIMEN DUTERTE ANG basehan sa singki kag dalagkuan nga mga atake batok sa mga rebolusyonaryo nga pwera kag pumuluyo sa bilog nga pungsod kag sa Isla sa Negros. Ginkanselar sini ang negosasyon sa kalinong sa tunga sang Government of the Republic of the Philippines (GRP) kag National Democratic Front of the Philippines (NDFP) paagi sa Proclamation 360 sadtong Nob-

yembre 2017 samtang ginanunsyo ang Proclamation 374 nga nagdeklarar nga mga teroristang organisasyon ang Communist Party of the Philippines (CPP) kag New People's Army (NPA) sadtong Disyembre 2017.

Sang Nobyembre 2018 ginimposar ang Memorandum Order 32 sa Isla sa Negros kag sa Bikol kag Samar samtang ginusunod ang implementasyon sang Executive Order 70 nga nagtukod

sang National Task Force to End Local Communist Armed Conflict (NTF-ELCAC) sadtong Disyembre 2018 sa pungsodnon nga lebel kag tukoron ini tubtob sa lebel sang barangay.

Tuman ka singki kag kapintas sang kontra-rebolusyonaryo nga giyera nga ginalunsar sang rehimen Duterte paagi sa Joint Campaign Plan Kapana-tagan nga nagmobilisa sa bilog pwera sang Armed Forces of



the Philippines (AFP), Philippine National Police (PNP) kag mga paramilitary nga tropa sini. Ginpamunoan ni Duterte, upod ang mga mataas nga opisyal kag retirado nga mga heneral sang AFP/PNP, ang NTF-ELCAC nga sandig sa whole of nation approach sang imperyalismong US agud makuga kag mapa-idalom sa iya nga diktadurya ang tanan nga mga sibilyan nga ahensya sang gobyerno, mga pribado nga sektor sa negosyo, institusyon kag mga organisasyon kag personalidad.

Tuyo ni Duterte nga ihamulag kag wasakon ang mga rebolusyonaryong pwersa paagi sa todo-larga kag dalagkuan nga operasyon militar kag itom nga propaganda sa tuman nga pagpakalain sa CPP, NPA kag NDF. Diri sa Negros ginpahamtang ang masobra 14 nga batalyon pangkombat sang Philippine Army kag PNP lakip na ang mga paramilitar nga pwersa kag mga death squads para sa amo nga katuyoan.

Halin sa ikaduha nga bahin

sang 2018, wala untat ang mga singki nga operasyon militar sang kaaway sa Isla sa Negros. Ginpresyur ang mga lokal nga gob-yerno (LGUs), halin sa mga probinsya, munisipalidad kag barangay; mga nagkalain-lain nga ahensya kag organisasyon sang reaksyonaryo nga gobyerno; mga pribado nga sektor sa negosyo; kag iban pa nga institusyon kag mga non-government organization nga magdeklara sa mga rebolusyonaryo nga pwersa nga persona non grata kag magpartisipar sa kontra-insurhen-sya nga kampanya.

Sugod 2019 tubtob subong, nagasingki ang militarisasyon sa kaumhan sa paglunsar sang AFP/PNP sang dululungan nga mga focused military operation (FMO) kag Retooled Community Support Program (RCSP) nga nagagamit sang indi magnubo sa isa tubtob duha ka batalyon sa isa ka panahon. Subongman, gin-atake ang kasyudaran paagi sa pag-reyd sa mga opisina sa mga progresibo nga organisasyon kag pag-aresto sa mga lider

masa, pag-red-tag sa mga militante nga organisasyon, personalidad kag mga oposisyon sa pulitika, kag pagpasaka sang mga pato-pato nga mga kaso kag pagtanom sang mga ebidensya.

Mas lala nga laragway sa pag-atake sang mga berdugo nga alipures sang rehimen Duterte sa Isla sa Negros amo ang mga masaker pareho sa Sagay 9, Oplan Sauron 1 kag 2 kag Oplan Branstark kag lapnagon nga mga ekstrahudisyal nga pagpatay (EJK) sa mga personahe kag masa nga nagapakig-away sang ila demokratiko nga kinamatarung kag interes atubang sang pagpamigos, pagpanghimulos kag paglapak sa mga tawhanon nga kinamatarung pareho sanday Alexander Ceballos, Atty. Ben Ramos, Konsehal Bernardino "Toto" Patigas kag Zara Alvarez.



ANG **Paghimakas**

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@yahoo.com



fb.com/negros.angpaghimakas



negrosrevportal.wordpress.com

Kombinado man sa dalagkuan nga mga atake sa kaumhan ang mga iskema sang pagpaniplang nga ginpangunahan sang AFP/PNP kag mga Provincial Task Force-ELCAC. Gintigayon ang “Dagyanan ng Mamamayan,” “Serbisyo Caravan,” “People’s Day” kag iban pa nga kaangay nga mati-plangon nga programa kag aktibidad halin sa mga syudad sang Canlaon kag Guihulngan tubtob Zamboanguita, Dauin, Siaton kag Sta. Catalina sa Negros Oriental. Gintigayon man ang pagkontra kag pagsabotahe sa mga aktibidad sang mga progresibo nga organisasyon pareho sang pagtigayon sang AFP/PNP sang peke nga “Peace Summit” sa komemorasyon sang Escalante Masaker sa mismong lugar nga ginpreparar sang mga progresibong organisasyon sadtong Setyembre 20, 2019, diin nangin kontrobersyal ang seremonya sa “pagsurender” sang ginasiling 2,510 indibidwal nga gintiplang kag ginpilit sang Philippine Army nga magsurender bilang mga katapo kag supporter sang NPA.

Sadtong kumander pa sang 303rd Brigade si Benedict Arevalo, aktibo ini sa pagkampanya sa mga eskwelahan sa Bacolod City sa pag-red-tag sa mga progresibo nga organisasyon para ihamulag ang mga ini sa mga estudyante kag akademya. May

pagpatawag sang meeting sa mga Sangguniang Kabataan para irekrut sila sa mga organisasyon nga ginasuportahan sang 303rd Brigade kag may kumbersyon sa mga kooperatiba sang mga mangunguma kag mamumugon sa uma pakadto sa Masaligan (79th Infantry Battalion) Farmers Cooperatives kag Fisherfolks Association.

Sa katapusan nga tuig sang berdugo nga rehimen ni Duterte, nagdeklara si Maj. Gen. Arevalo, ang bag-o nga kumander sang 3rd Infantry Division (3ID), nga tapuson na sang AFP ang insurhensya sa Isla sa Negros sini nga tuig tubtob Hunyo 2022. Ang kabilogan nga

katuyuan sang kaaway amo ang paghamulag sa mga rebolusyonaryo nga pwersa halin sa pumuluyo kag pagkatapos wasakon ini sa makahulug sa paagi.

Lauman ang pinaka-grabe nga atake sa mga pwersa sang 3ID, 303rd Brigade kag 302nd Brigade sang Philippine Army, subongman sang tropa sang PNP idalom sang Joint Task Force Negros, sa kaumhan kag mangin sa kasyudaran. Pinakamaayo nga dugang ipataas sang rebolusyonaryo nga pwersa ang ila kaisog, determinasyon kag militansya sa pag-atubang sa sini nga tipo sa atake sa kumprehensibo nga paagi.



Pasismo ang palatandaan sang kahuyangan kag desperasyon sang estado sa tunga sa isa ka sosyo-ekonomiko nga krisis nga ginpalala sang pandemya nga COVID-19

DALAGKU KAG ESKANDALOSO ANG BADYET kag gasto sa kontra-insurhensya nga kampanya sang rehimen Duterte lakip na ang pagpamakal sang moderno nga armas kag iban pa nga kagamitan militar nga daku nga parte nakurakot na sang mga mataas nga opisyal sang AFP/PNP. Bagsak ang ekonomiya bangud sa sosyo-ekonomiko nga krisis sa nagahari nga sistema nga ginpalala sa pandemya nga COVID-19 nga ginhanot sang lapnagon nga korapsyon sa lain-lain nga ahensya sang reaksyonaryo nga gobyerno. Ang rehimen Duterte nagatindog nga tigpangapin sang garuk nga reaksyonaryo nga sistema nga malakolonyal kag malapyudal kag sa interes sang nagahari nga sahi sang dalagku nga komprador burgesya-agalon mayduta sa kahalitan sa malapad nga masa sang pumuluyo upod na ang mga nahanunga nga mga pwersa sang sosyedad.

Target sa nagadaku nga kaakig sang pumuluyo ang rehimen bangud samtang biktima ang pumuluyo sa pandemya nga

COVID-19, mga lockdown kag kwarantina nga kulang sang ayuda, grabe nga gutom kag kapi-gaduhon, kag pagkadula sang pangabuhian kag trabaho, ang mga dalagku nga opisyal militar kag mga burukrata sa mga ahensya sa gobyerno, pamilya kag mga kroni ni Duterte na-imbolbar sa malaparon kag makahuluya nga mga kaso sa korapsyon nga nagpalala sa bangkarote nga kahimtangan sa ekonomiya kag pangpublikong pundo.

Grabe ang krisis sa pinansya kag rekurso atubang sa pandemya nga COVID-19 apang wala sang mahatag ang rehimen Duterte nga solusyon sa problema sang pumuluyo sa lapnagon nga kapigadohon, gutom, kawad-on ukon kakulang sang trabaho kag pagkawasak sa pangabuhian bangud sa lockdown kag kwarantina nga ginimposar sang militarista nga rehimen.

Ginbuhinan ang badyet nga natalana para sa edukasyon, ikaayong lawas kag iban pa nga serbisyo sosyal. Tuman ka kulang ang pundo nga gintalana

para sa pagkontra sa COVID-19 kag para sa ayuda sa milyon-milyon nga pumuluyo nga gin-gutom kag nadulaan sang pangabuhian bangud sa COVID-19 pandemya. May mga bagyo pa sa 2020 kag sini lang 2021 nga nagtuga sang grabe nga kahalitan sa pangabuhian, kabuhi, mga balay kag iban pa nga impraistruktura sang pumuluyo nga nagasinggitan sang ayuda sa tunga sang higanteng pundo para sa AFP/PNP kag kontra-insurhensya. Isa na sini ang Barangay Development Program (BDP) sang NTF-ELCAC nga gintawag nga pork barrel sang militar.

Madasig nga nagdamu ang mga pumuluyo nga naugot sa mga tikang sang rehimen batok sa pandemya nga COVID-19, lapnagon nga pagpamatay sa “giyera kontra-droga,” pagpamatay sa mga abogado, manunudlo, mga mangunguma kag mga nahanunga nga pwersa nga kritikal sa mga kontra-pumuluyo nga palisiya sang pasista nga rehimen, kag pangdakop kag red-tagging sa mga progresibo

.....  @npanegros



Ang rehimen Duterte nagatindog nga tigpangapin sang garuk nga reaksyonaryo nga sistema nga malakolonyal kag malapyudal kag sa interes sang nagahari nga sahi sang dalagku nga komprador burgesya-agalon mayduta sa kahalitan sa malapad nga masa sang pumuluyo upod na ang mga nahanunga nga mga pwersa sang sosyedad.



fb.com/apolinariogatmaitan.39



kag militante nga organisasyon. Tuman ka pasista ang rehimen Duterte atubang sa pumuluyong Pilipino apang daw tutoy ini atubang sa agresibo nga pag-okupar sang China sa Exclusive Economic Zone (EEZ) kag Extended Continental Shelf (ECS) sang Pilipinas sa West Philippine Sea.

Amat-amat nagdaku ang biak sang nagahari nga sahi bangud sa paboritismo kag kroniyismo sa naghari nga rehimen. May yara sang sikreto nga disgusto sa pila ka retirado kag aktibo nga elemento sa hanay sang AFP kag PNP angot sa kontrobersiya sa West Philippine Sea kag pagpakatuta sang rehimen Duterte sa China. Nagdugang pa ang biak sa nagahari nga sahi samtang nagalapit na ang eleksyon presidensyal sa 2022.

Akig na ang masa sa mga pasista nga hinimoan sang berdugo nga rehimen ni Duterte. Luto na ang kahimtangan sa pagbaskog sa pagpamatok sang masa kun husto nga mapukaw, ma-organisa kag mapamunoan ang ila paghulag. Labi nga nahamulag sa malapad nga masa sa kaumhan ang kaaway bangud sang ila pasista nga mga krimen kag brutalidad. Nagasandig sila sa pagpamahug, pagpaniplang kag iban pa.

Ang NPA bilang hukbo sang pumuluyo handa sa mga dalagku nga kabudlayan kag sakripisyo sa pagserbisyo sa pumuluyo

SA KABILOGAN NGA SITWASYON KARON sa giyera sa Isla sa Negros, base sa balanse sa pwersa sang reakysonaryo kag rebolusyonaryo nga pwersa, tuman ka imperyor ang mga rebolusyonaryo nga pwersa kag naga-atubang sang tuman ka superyor nga naga-atake nga kaaway. Apang sa isa ka gintalana nga panahon kag lugar mahimo nga makaangkon sang superyoridad ang mga rebolusyonaryo nga pwersa kag mapapas ang mahuyang kag nahamulag nga bahin sang kaaway kon ang amo nga superyoridad madiskubre, mahangpan kag magamit.

Ang ini nga superyoridad gamay, limitado kag dasig lang madula. Apang kung husto ini magamit, amat-amat nga makatipon sang kadalag-an bisan ano ka gamay kag limitado batok sa tuman ka daku kag mabaskog nga kaaway nga may bentahe sa paghanas, kadamuon, armas kag lohistika kag iban pa nga rekursu. Dapat aktibo nga diskubrehon kag tumuron sang mga Pulang hangaway ang mga kahinaan sang kaaway kag gamiton ini agud amat-amat sila nga dugmukon.

Ang NPA padayon nga nakaagum sang madalom kag malapad nga suporta sang masang mangunguma bangud nagabulig ini sang ila paghimakas para sa matuod nga reporma sa duta kag sa iban pa nga paghimakas batok sa tanan nga porma sang pagpanghimulos kag pagpamigos. Bisin naagyan ang mga seryosong kahalitan bangud sa dalagku, singki kag kalawigon sa pag-atake sang kaaway nga pila ka beses ang kadakuon kag kabaskugon, kumpyansado sa gihapon ang NPA nga mapangibabawan ang mga kabudlayan kag sakripisyo bangud makatarunganon ang giyera nga ginalunsar sini kag nagserbi sa pumuluyo.

Kinahanglan ipataas ang pagtinguha sa lapnagon nga pagpukaw, pag-organisa kag pagpahulag sa malapad nga masa; resolbahon ang mga sayop, kahinaan kag kakulangan; kag padayon nga isulong ang lapnagon kag sunson nga pakig-away gerilya base sa nagalapad kag nagadalom nga baseng masa. Importante nga maayo ang Pulang hangaway sa pagtuon sang mga leksyon halin sa inagihan sang rebolusyonaryo nga kahublagan sa Negros, wala untat nga kilalahon ang kaaway, kag patalumon ang paghangop sa mga laye sang inaway banwa kag pakig-away gerilya sa subong nga halintang sang estratehiko nga dependsiba.

Dapat mag-ukay sang natipon nga manggad sang inagihan sa malawig nga panahon nga pagpakig-away sa baskog kag gamhanan nga kaaway. Magtuon sa rebolusyonaryo nga teorya para maayo nga ma-aplikar ini sa kongkreto nga kahimtangan kag praktika. Hatagan sang mataas nga importansya ang mga patakaran kag pagpa-athag sang Partido nga napanahon nga ginpagwa. Indi magkampante apang kalma sa pagpamensar; mainit kag militante apang sistematisado sa rebolusyonaryo nga

pagtrabaho.

Ang mga detatsment sang Citizen Armed Force Geographical Unit (CAFGU) kag RCSP gingamit sang kaaway nga mga blokeyo para ipiton ang mga yunit sang NPA samtang ang ila yunit pangkombat nga nagalunsar sang FMO amo ang pangwasak. Himuon nga indi epektibo ang mga RCSP kag mga detatsment bilang mga blockhouse sang ila pagpalibot sa mga pwersang gerilya paagi sa paghimo sang kontra-ensirkulo. Dapat ilunsar ang kontra-ensirkulo paagi sa kumprehensibo kag magkatimbang nga pagpasulong sa kahublagan masa sang armado nga paghimakas, rebolusyong agraryo kag pagpundar sang baseng masa sa idalom sang hugot kag epektibo nga pagpamuno sang mga komite sa Partido kag mga kumand sang NPA.

Kinahanglan makiggitgitan sa kaaway ang mga rebolusyonaryo nga pwersa sa plano sini nga wasakon ang baseng masa sa mga konsolidado kag relatibo nga konsolidado nga mga erya. Mas mapa-uswag pa sang Pulang hangaway ang pakipaggitgitan sa kaaway paagi sa pagsusteni sa hugot nga pakig-

angot sa masa kag mapadasig ang pagtukod sang rebolusyonaryo nga kusog kag paghulag sang masa sa padayon nga pagpasulong sang mga kontra-pyudal kag kontra-pasista nga paghimakas samtang ginpa-uswag ang ila direkta nga partisipasyon sa armado nga paghimakas. Ipa-hugot ang angot sa masa paagi sa linyang masa kag husto nga pamaagi sa pagpukaw, pagorganisa kag pagmobilisa sa ila. Maghimo sang pat-od nga plano para sa pagtinguha sa pagrek-luta, pagpadaku kag paghanas sa NPA sa malip-ot nga panahon.

Sa Isla sa Negros, malapad ang kadutaan kag madamo ang pumuluyo. Ang mga lugar nga wala sang RCSP kag detatsment padayon nga naghulat sa NPA. Hingalitan ang panahon para madasig nga mapundar ang baseng masa sa ini nga mga lugar, bisan ang mga lugar nga ara ang RCSP ukon may detatsment indi naton pagbayaan. Sa baylo makipaggitgitan sa kaaway sa pagorganisa, pagpukaw kag pagpahulag sa pumuluyo sa ini nga mga lugar. Tinguhaon nga mapundar liwat ang pulitikal nga paghiliusa sa mga lugar nga may yara RCSP kag

detatsment.

Sa kabilugan, bisan pa sa kadakuon kag kabaskugon sang AFP/PNP, madamu ini kahuyangan nga bulnerable sang at-ritibo kag anihilatibo nga mga aksyon militar sang NPA. Ang mga yunit sang RCSP kag mga detatsment bulnerable sa atake sang NPA kun hamulag ini sa iban nga pwersa. Makaya nga i-overrun ini kon may maayo nga paniktik kag paghanda sa patagawayan, may nahanda nga superyor nga pwersa, maggamit sang surpresa, madasig nga atake kag may suportang masa.

Ang dalagku nga kolum sang kaaway pag-abot sa interyor nga mga erya mag-dispers pakadto sa platun ukon seksyon kadakuon, bulnerable sa anihilatibo nga aksyon militar sang konsentrado nga pwersa sang NPA. Mas madamu pa ang madiskubre nga bulnerabilidad sang kaaway kon maayo ang hilikuton paniktik.

Dapat determinado ang NPA kag pataason ang kaisog sa pagpakig-away, kag pangapinan ang interes sang pumuluyo kag ang mga naabot nga kadalagan sang rebolusyon.



Ang Paghimakas Online

Mas mapa-uswag pa sang Pulang hangaway ang pakipaggitgitan sa kaaway paagi sa pagsusteni sa hugot nga pakig-angot sa masa kag mapadasig ang pagtukod sang rebolusyonaryo nga kusog kag paghulag sang masa sa padayon nga pagpasulong sang mga kontra-pyudal kag kontra-pasista nga paghimakas samtang ginpa-uswag ang ila direkta nga partisipasyon sa armado nga paghimakas.



Ang rebolusyonaryo nga pwersa handa sa pag-atubang sa singki kag dalagkuan nga atake sang kaaway

HANDA ANG REBOLUSYONARYO NGA PWERSA sa Isla sa Negros sa dugang pa nga mga kabudlayan kag sakripisyo. Dugang nga ipataas ang determinasyon kag kaisog nga ubos-kusog nga liwat nga paslawon ang plano sang berdugo nga rehimen Duterte gamit ang 3ID, 303rd Brigade, 302nd Brigade, Scout Ranger Company, Civil Military Operations Battalion sang Philippine Army kag Special Action Force Battalion kag Regional Mobile Force Battalion sang PNP nga wasakon ang rebolusyonaryo nga kahublagan sa Isla bag-o matapos ang iya termino. Ilunsar ang kontra-kampanya batok sa dalagkuan kag masingki nga atake sang berdugo nga kaaway.

Nagakinahanglan sang kabilogan nga mobilisasyon sa mga yunit sang NPA sa mga larangan gerilya; kag mga yunit milisya, yunit depensa sa baryo kag mga organisadong masa sa konsolidado kag relatibo nga konsolidado nga mga erya. Ang baseng masa sa mga sonang gerilya may papel, lakip na ang mga abyan kag alyado sa rebolusyon, sa malapad nga pagpamatok sa pasista nga atake sang berdugo nga kaaway.

Maghatag sang konsiderasyon sa daku nga importansya sa kadalag-an sang mga taktikal nga opensiba; pili-on ang mga bira nga magpatingkad sa pangpulitika nga basehan sang armadong paghimakas.

Kinahanglan nga mataas ang pleksibilidad sang mga Pulang hangaway. Mangin pleksible sa pagtalana sang mga pormasyon para sa aksyon militar. Magtukod sang mga magagmay nga separado nga yunit nga dasig makamaniobra kag maka-

lusot-lusot sa tunga sang mga pusisyon sang kaaway para sa operasyon pangharas kag iban pa nga atritibo nga aksyon agud mahatagan ang nanguna nga yunit sa oportunidad nga makapatuman sang isa ka epektibo kag solido nga sandigan nga taktikal nga opensiba batok sa kaaway. Kinahanglan ang mas mataas nga mobilidad sa bisan ano nga pagkampo. Dapat permi nga naka-impake, kag buhinan sa mabug-at nga mga kagamitan ang ginapangkampohan. Kinahanglan may yara sang maayo kag athag nga sistema sa pagmanioobra sang mga indibidwal kag mga yunit panahon sa gulpi nga pag-atake sang kaaway.

Ang FMO kag RCSP sang AFP sarang nga paslawon sang mga yunit sang NPA. Ang kampanya sang mga sandigan nga taktikal nga opensiba sang NPA nga makawasak sa kaaway ang pinaka-epektibo nga pamaagi sa pag-atubang sa mga FMO. Paagi sa bulig sang masa sa pagsunod sa hulag sang kaaway, pagpili sang paborable nga tereyn, pagpamilyarisa sa mga ruta kag padron sang sulod-gwa sang kaaway, maayo nga paggamit sa mga command-detonated explosives kag igsakto nga tiempo diin lapyo na ang mga tropa sang kaaway sa malawig nga inadlaw nga operasyon, masarangan sila nga bunalon sang dalagku nga halit sang NPA. Kumbinahon ini sa serye sang mga operasyon pangharas sa nagahulag nga dalagku nga tropa sang kaaway kag pag-atake sa mahuyang sini nga bahin.

Importante ang regular nga pagtasa sa kahimtangan sang kaaway kag pagbasa sa ila disenyo kag plano sa matag panahon, kag amo man ang

kahimtangan sa kaugalingon nga pwersa—ang NPA, milisya, organisasyong masa kag baseng masa. Kinahanglan ini para madasig nga matumod ang mga problema kag kahuyangan agud gilayon ini nga masolbar.

Hatagan sang nagakaigo nga edukasyon ang mga Pulang hangaway kaangot sang mga pagsulundan kag disiplina sang NPA, proseso sang rebolusyonaryo nga hustisya, angut sa Comprehensive Agreement on Respect of Human Rights and International Humanitarian Law (CARHRIHL) kag iban pa nga may kaangtanan sini.

Pataason ang disiplina sa pagpatuman sa mga regulasyon militar kag organisado nga paghulag sa tanan panahon sandig sa istruktura sang pormasyon kag kumand sa mga yunit sang NPA. Magpundar sang malapad kag paborable nga lugar sa manioobra sa mga yunit sang Pulang hangaway. Magtukod sang sikreto kag hilway nga mga ruta. Segurohon ang kaluwasan sa mga yunit sang NPA paagi sa pagdihon sang athag nga mga patakaran para malikawan ang mga depensiba nga aksyon. Pauswagon ang sistema sang pagbase nga may mataas nga konsiderasyon sa paglikaw sa monitoring sa aso, hayag sa gab-i, signal tracking sang kaaway kag may kober ukon depensa batok sa mga drone, helikopter kag bomba.

Himuon nga bulag kag bungol ang kaaway paagi sa pagpataas sang lebel sa kahublagan nga pagsikreto para likom sa kaaway ang hulag kag plano sang NPA. Daku ini nga halambalanon para madingot nga mahatagan sang ideya ang kaaway sa diin nila pat-ud nga

gamiton ang ila mga drone kag ilunsar ang ila nga pag-atake.

Uyatan sang hugot ang pag-sikreto sa mga kompartmentalisado kag taktikal nga mga impormasyon. Pulupanahon nga tasahon ang presensya sa erya sang mga asset sang kaaway, mga Barangay Intelligence Network kag iban pa nga lambat paniktik sang kaaway. Kontrolon ang mga malain kag indi masaligan nga elemento nga dali lang mapahulag sang kaaway. Maghalong sa mga indi masaligan nga mga elemento nga magtuhaw panahon sa masingki nga operasyon militar. Magdihon sang makahulug nga tikang para tinloan ang mga erya.

Ihanda ang baseng masa sa pagpangapin kag pagpamatok sa madata nga militarisasyon sa kaumhan. Isa ka yabe nga hambalanon sa inaway banwa kun paano ihanda kag ikasa ang mga organisasyong masa kag baseng

masa para sa pagpangapin kag pagpamatok. Hiliusahon ang mga rebolusyonaryo nga pwersa sa mga lokalidad sa analisis sang Partido sa sitwasyon pampulitika kag plano sang kaaway kag mga katungdanan nga dapat hatagan tum-ok sandig sa nagaluntad nga sitwasyon militar.

Idihon ang athag nga plano kag mga partikular nga mga hilikuton sang baseng masa. Tukoron ang kwerpo sa depensa sa sulod sa mga organisasyong masa. Himuon nga sentro sa pagpahulag ang mga sanga sang Partido kag mga yunit milisya. Ayuhon ang ila nga pormasyon nga santo sa kahimtangan (iskwad o team) kag hilikuton. Tanan nga tumod ukon markado nga elemento sa hanay sa masa nga posible mahimo nga target sang kaaway segurohon nga indi maigo sa operasyon militar sang kaaway paagi sa pagsulod sa NPA ukon temporaryo nga isaylo sa iban

nga lugar.

Magkasa sang plano sa pagpangapin kabahin ang paghimakas kontra-militarisasyon, organisado nga ebakwasyon kag iban pa. Segurohon nga may edukasyon ang masa sa CAR-HRIHL kag hambalanon sa tawhanon nga kinamatarung sa pangkabilogan kag sa espesyal nga kurso sang masa sa inaway banwa.

Ikasa ang plano sa pagpalapad kag rekoberi sa baseng masa sa konteksto sa dalagkuan nga operasyon sang kaaway. Yabe sini ang paglunsad sang madinalag-on nga kontra-pyudal nga paghimakas. Pasinsinon, palapnagon kag papagsikon ang hilikuton propaganda. Padayon nga hiliusahon ang mga masa kag ipataas ang ila kamuklatan pangpulitika batok sa kaaway kag ang ila determinasyon sa pagrebolusyon. **AP**

